



Broj: 01/1-02-1334/21
Ilijaš, 24.06.2021. godine

Z A P I S N I K

sa 7. sjednice Općinskog vijeća Ilijaš, održane dana 24.06.2021. godine, sa početkom u 10:00h.

Sjednicom Općinskog vijeća Ilijaš predsjedavala je predsjedavajuća Općinskog vijeća g-đa Alma Omerović.

Prisutni vijećnici:

RB.	IME I PREZIME
	SDA
1	ALMA OMEROVIĆ
2	ANEL BUMBULOVIĆ
3	MEHMED SINANOVIĆ
4	ELMA MASNOPITA
5	ALEN HASKOVIĆ
6	ALEN ARNAUTOVIĆ
7	ADEM ALIĆ
8	HALID DIZDAREVIĆ
9	SEID BEKTIĆ
10	KENAN HASIĆ
11	SEMIR DEDIĆ
12	DENIS DILBEROVIĆ
	NIP
13	VERNESA BEŠLIJA
14	ALMIR ŠPIODIĆ
15	KENAN BUZA
16	DINO ČUSTOVIĆ
17	ADNAN ABADŽIJA
18	AMINA RAMIĆ
19	MEHO HIDO
20	ALEMA DŽAFO
	SDP
21	ALAN ŠERAK
22	ANELA SUBAŠIĆ
23	SELMA BARIĆ
	SBB
24	AKIF BEŠLIJA
25	MUHAMED HANDŽIĆ

Odsutni vijećnici:

1. Semir Dedić i
2. Alan Šerak

Prisutni gosti:

1. Benis Fazlić - direktor JU KSC i Radio Ilijaš
2. Amra Bučan - šef Službe socijalne zaštite Općine Ilijaš
3. Nermine Durić-Kahvedžić - Radio Ilijaš

Ostali prisutni:

1. Akif Fazlić – općinski načelnik
2. Nizama Mališević - pomoćnica načelnika
3. Ilda Kahriman – sekretar OV-a Ilijaš
4. Enisa Mešetović - stručni saradnik za obrazovanje, pitanje mladih i NVO sektor
5. Meho Glijiva - stručni saradnik za poslove mjesnih zajednica i informisanje
6. Dženan Suša – IT administrator
7. Maida Habibović – zapisničar

Predsjedavajuća je otvorila sjednicu i konstatovala da su prisutna 23 vijećnika, te pozvala vijećnicu Alemu Džafo - člana Etičke komisije da pročita Zaključak koji je ova Komisija donijela.

ALEMA DŽAFO - vijećnica NIP-a (član Etičke komisije)

Zaključak Etičke komisije glasi:

Nalaže se vijećnicima Općinskog vijeća Ilijaš, da se pridržavaju Kodeksa etike izabranih zvaničnika, obzirom da Etička komisija Općinskog vijeća Ilijaš prati i nadzire rad vijećnika i ukazuje na pojave kršenja Kodeksa na prethodnim sjednicama od strane pojedinih vijećnika Općinskog vijeća Ilijaš.

Također, Komisija ističe da je ovo posljednja opomena, te će ista za bilo koje neprimjereno ponašanje početi izricati sankcije za povredu ponašanja izabranih zvaničnika u skladu sa Kodeksom.

ALMA OMEROVIĆ - predsjedavajuća

Zatim je dala na razmatranje Zapisnik sa šeste sjednice OV-a.

HALID DIZDAREVIĆ - vijećnik SDA

U Zapisniku ima tehničkih grešaka koje treba ispraviti.

U odgovoru na vijećnička pitanja i inicijative koji je dostavila Komisija za selekciju i ocjenu prijava po javnom pozivu za prikupljanje zahtjeva udruženja građana i nevladinih organizacija radi dodjele sredstava za finansiranje/sufinansiranje iz Budžeta Općine Ilijaš za 2021. godinu napisano je da je Halid Dizdarević vijećnik NIP-a što nije tačno, nego je vijećnik SDA i također kod Anela Bumbulovića je greška, a koje treba ispraviti.

Primjedbi na Zapisnik više nije bilo, pa je OV-e većinom glasova usvojilo Zapisnik sa

6. sjednice OV-a.

Pročitala je predloženi dnevni red i isti dala na razmatranje.

AKIF FAZLIĆ - općinski načelnik

Predložio je dopunu dnevnog reda sa uvrštavanjem tačke: Prijedlog Rješenja iz imovinsko-pravne oblasti kojim se utvrđuje javni interes za izvođenje radova na izgradnji filter postrojenja za prečišćavanje pitke vode sa izvorišta "Zajazine" na lokalitetu naselja Kamenica.

Primjedbi i prijedloga na predloženi dnevni red više nije bilo, pa je OV-e jednoglasno usvojilo slijedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 6. sjednice Općinskog vijeća Ilijaš
3. Prijedlog Odluke o usvajanju Izvještaja o radu i finansijskom poslovanju Javne ustanove "Kulturno-sportski centar i Radio Ilijaš" za 2020. godinu
4. Prijedlog Odluke o davanju saglasnosti na Plan rada Javne ustanove "Kulturno-sportski centar i Radio Ilijaš" za 2021. godinu
5. Prijedlog Odluke o prestanku važenja Odluke o davanju saglasnosti za zaključivanje i potpisivanje Aneksa ugovora o prodaji broj:01/1-02-222-9/16 od 28.01.2016. godine
6. Prijedlog Odluke o neposrednoj pogodbi za prodaju neizgrađenog građevinskog zemljišta k.č.br.965/8 K.O. Ilijaš Grad
7. Prijedlog Odluke o raspisivanju općinskog referenduma
8. Prijedlog Rješenja iz imovinsko-pravne oblasti kojim se utvrđuje javni interes za izvođenje radova na proširenju sistema vodosnadbijevanja sa izvorišta "Jazići" na lokalitetu naselja Kamenica
9. Prijedlog Rješenja iz imovinsko-pravne oblasti kojim se utvrđuje javni interes za izvođenje radova na izgradnji filter postrojenja za prečišćavanje pitke vode sa izvorišta "Zajazine" na lokalitetu naselja Kamenica
10. Prijedlog Rješenja iz imovinsko-pravne oblasti broj: 04-31-853/05
11. Prijedlog Rješenja iz imovinsko-pravne oblasti broj: 06/1-27-991/21
12. Prijedlog Rješenja o:
 - a) razrješenju člana, a time i predsjednika Komisije za zaštitu ljudskih prava, ravnopravnost spolova, predstavke i prijedloge
 - b) izboru člana, a time i predsjednika Komisije za zaštitu ljudskih prava, ravnopravnost spolova, predstavke i prijedloge
13. Informacija o stanju iz oblasti socijalne zaštite na području Općine Ilijaš za 2020. godinu.

AD-1

Vijećnička pitanja i inicijative

1. VERNESA BEŠLIJA - vijećnica NIP-a

Pitanja:

S obzirom na to da Biznis centar posluje u sastavu Jedinственог općinskog organa uprave - Općine Ilijaš, postavljam pitanja:

1. Da li se naplaćuju termini za korištenje sale Biznis centra? Ukoliko da, koliki su ostvareni prihodi od istog?

2. Koliki su izdaci za režije i održavanje Biznis centra u 2020. godini?

Molim vas da mi dostavite račune ili izvode na kojima je vidljivo koliki su bili troškovi za električnu energiju i ostale komunalne usluge u 2020. godini.

3. U Izvještaju o zaključenim Ugovorima o javnim nabavkama za 2021. godinu na dan 15.06.2021. godine, naveden je i direktni sporazum u iznosu od 900,00 KM zaključen sa "Media control" Ilijaš, a koji se odnosi na usluge prenosa i fotografisanja događaja obilježavanja Dana općine i Dana nezavisnosti BiH.

Zbog čega je zaključen ugovor, kada JU "KSC i Radio Ilijaš" može da pruži navedene usluge, a iz Budžeta se izdvajaju značajna sredstva za JU "KSC i Radio Ilijaš" i opremu koju koristi?

Molim vas da mi dostavite kopiju direktnog sporazuma zaključenog sa "Media control" Ilijaš, kao i zahtjev koji ste poslali drugim dobavljačima za dostavu ponude, tj. njihove ponude za traženu uslugu.

Inicijativa:

1. Podnosim inicijativu za izgradnju trotoara u MZ Luka, tačnije na lokaciji preko puta firme Sacom d.o.o.

Obrazloženje: Trotoar je izgrađen kompletnom dužinom, međutim, na navednoj lokaciji preko puta firme Sacom d.o.o. nedostaje nekoliko metara trotoara zbog privatnog posjeda, te su građani prinuđeni da se na tom dijelu kreću cestom, a znamo da je to područje industrijske zone koje je veoma prometno i ima mnogo nesavjesnih vozača koji ne poštuju ograničenja, što predstavlja dodatnu opasnost za pješake.

Kako navode građani iz MZ Luka, vlasnik nekretnine gdje dolazi do prekida nikada nije sporio izgradnju trotoara na tom dijelu, te podnosim inicijativu da se riješe imovinsko-pravni odnosi i izgradi dio trotoara koji nedostaje.

MEHO HIDO - vijećnik NIP-a

Inicijative:

1. Pokrećem inicijativu za formiranje vatrogasnog društva u Srednjem. Zbog veličine teritorije i razuđenosti, učestalosti požara kao prirodnih nepogoda i uloge u spašavanju imovine i lokalnog stanovništva javlja se potreba za formiranjem vatrogasnog društva u Srednjem.

2. Pokrećem inicijativu za održavanje sastanka Kriznog štaba Općine Ilijaš na čelu sa načelnikom, te sa predstavnicima Civilne zaštite, policijskih organa, komunalnog inspektora, predsjednika gradskih i prigradskih Savjeta mjesnih zajednica, predsjednika džamijskih odbora, medija, a sve u cilju nadolazećeg vjerskog praznika Kurban-bajrama i preventivnog djelovanja na situaciju koja nam se desila prošle godine. Obzirom da praznik pada na 20. juli i očekuju se velike vrućine, te je potrebno da se donesu adekvatne mjere oko zbrinjavanja animalnog otpada, kao i sankcionisanje neodgovornih pojedinaca. Životnu sredinu smo posudili od svojih unuka i o tome trebamo voditi računa.

3. Pokrećem inicijativu za sanaciju makadamskog puta u naselju Medojevići (MZ Srednje), zvanog "Put spasa" koji povezuje naselja Medojevići preko Jelice, uključujući i Stanove, do Velikih Šuma, u dužini oko 2,5 km. Put je trenutno u nezadovoljavajućem stanju, mnogo je eksploatisan i iziskuje određene zahvate. O važnosti ovog puta suviše je i pričati, uzimajući u obzir ratni period tokom kojeg je ovaj put bio od presudnog značaja. Sada ima ulogu protupožarnog puta između dvije mjesne zajednice (Srednje i Gajevi), a osim toga, koristio bi i lokalnom stanovništvu, te omogućio povratak desetak porodica na svoja ognjišta.

ALEMA DŽAFO - vijećnica NIP-a

Pitanje:

1. Koliko rasvjetnih tijela je u ovoj godini postavljeno i na kojim tačno lokacijama?

Obrazloženje: Postavljam pitanje prema nadležnoj službi koliko rasvjetnih tijela je postavljeno u ovoj godini i na kojim tačno lokacijama, s obzirom da je odgovor na brojne inicijative ovog tipa da je planirano postavljanje 100 rasvjetnih tijela u ovoj godini.

Inicijative:

1. Pokrećem inicijativu za rješavanje rasvjete u MZ Luka, od firme Ilmex do skretanja za tunel.

Obrazloženje: Iako postoje rasvjetna tijela u navedenom području, većina njih nije u funkciji, te pokrećem inicijativu za rješavanje ovog problema.

2. Pokrećem inicijativu za sanaciju potoka u ulici Polomska, MZ Podlugovi, koji se nalazi odmah uz put i koji stvara probleme mještanima, s obzirom da navedeni put građani sami od svojih sredstava saniraju, ali spomenuti potok uništi njihova ulaganja.

Obrazloženje: U navedenoj ulici uz put koji mještani tog područja samostalno saniraju i finansiraju, neophodno je sanirati potok koji usljed oborina naraste i uništi sve uloženo. Također, građani smatraju da je neko samostalno uključio kanalizaciju u navedeni potok, te se zbog toga redovno širi izuzetno neugodan miris. Ovim putem tražim od nadležne službe da izađe na lice mjesta i nađe najadekvatniji način za dugoročno rješavanje ovog problema.

3. Pokrećem inicijativu za postavljanje pet rasvjetnih tijela u ulici Polomska, Podlugovi, ispod Apartmanskog naselja Sovrle.

Obrazloženje: Navedeni prostor nije osvjetljen, a u ovo području se nalazi deset kuća sa desetero djece.

ALEN HASKOVIĆ - vijećnik SDA

Inicijativa:

1. Iniciram prijedlog Sedmoj policijskoj upravi Sarajevo, odnosno Policijskoj stanici Ilijaš da, u okviru utvrđenih nadležnosti, poduzme aktivnosti sprječavanja vožnje biciklima u predjelu pješačke zone, tzv. šetališta u Ilijašu.

Obrazloženje: Veliki broj građana Ilijaša u večernjim terminima, sa svojim porodicama,

sa djecom, provodi vrijeme na ovom, propisno obilježenom lokalitetu. Istovremeno, prisutan je i nemali broj onih, koji ne poštuju označene zabrane i, u predjelu pješačke zone, voze bicikle, te tim aktivnostima ozbiljno ugrožavaju bezbjednost, prije svega, najmlađih sugrađana.

ALMIR ŠPIODIĆ - vijećnik NIP-a

Pitanja:

1. U kojoj fazi je realizacija projekta rekonstrukcije puta preko Vratuše za Mrakovo? U Operativnom planu za 2021. godinu planirana je prva faza rekonstrukcije što podrazumijeva rješavanje oborinskih voda i podzemnih instalacija. Kada možemo očekivati početak radova?

2. Da li na trasi puta preko Vratuše od ulice Polomska prema Mrakovu postoji neka imovinsko-pravna prepreka, te se zbog toga ne vrši rekonstrukcija puta? Ako postoji, molim da mi se obrazloži šta je u pitanju i da li postoji način da se ista prevaziđe?

3. Šta je projektom planirano uraditi na rekonstrukciji puta preko Vratuše za Mrakovo u smislu: koja širina puta, koliko kolovoznih traka i koliko je širina trotoara, na koji način riješiti oborinske vode itd.?

Rekonstrukciju ovog puta građani su još 2019. godine predložili kao prioritet kroz Javnu raspravu za Budžet 2020. godine i uvršten je u Operativni plan načelnika za istu godinu, ali očigledno nije realizovano.

4. Po mojim informacijama, Vlada Kantona Sarajevo, tačnije ministar komunalne privrede, za Općinu Ilijaš izdvojio je preko 850.000,00 KM za projekte komunalne infrastrukture u našoj općini. Da li ste dio tih sredstava planirali uložiti za prvu fazu rješavanja pomenutog puta?

5. Koliko je planirano parking mjesta na parceli k.č.br.270/2 K.O. Ilijaš Grad, preko puta autobuske stanice u parku gdje je izgrađane prošle godine stambena zgrada P+3?

6. Da li broj parking mjesta, po Zakonu, odgovara broju stanova kojim se predviđa 1,3 do 1,9 parking mjesta po jednom stanu?

HALID DIZDAREVIĆ - vijećnik SDA

Na prethodnoj sjednici OV-a sam pokrenuo inicijativu i pitanje i nisam zadovoljan odgovorima.

Inicijativa je bila prema JU Dom zdravlja KS da se riješi status pulmologa u OJ Dom zdravlja Ilijaš.

Dobio sam odgovor da je JU Dom zdravlja KS pokrenuo proceduru za dobijanje saglasnosti od Ministarstva zdravstva i Vlade KS za upošljavanje pulmologa.

Dakle, nisam tražio upošljavanje novog pulmologa, nego sam tražio da se riješi status pulmologa. U obrazloženju sam naveo da u posljednje dvije godine, odkada je dotadašnji pulmolog, dr.Dejan Dragišić preraspoređen na radno mjesto u drugoj OJ, građani općine Ilijaš usluge pulmologa ostvaruju u drugim OJ. Ovakav odnos rukovodstva JU DZ KS građane Ilijaša dovode u nepovoljan položaj, u odnosu na građane drugih općina, jer za

ostvarivanje usluge pulmologa moraju da putuju i do 50 km. Prema standardima i normativima u zdravstvu ("Sl. novine Federacije BiH", broj 58/18) jedan pulmolog se raspoređuje na 65 hiljada stanovnika, te prema tome, općini Ilijaš pripada jedan pulmolog minimalno dva dana u sedmici. Treba napomenuti da pojedine općine, sa istim ili manjim brojem stanovnika, imaju pulmologa pet dana u sedmici.

S tim u vezi, JU Dom zdravlja KS bi trebao izvršiti preraspodjelu i dodijeliti pulmologa građanima općine Ilijaš bar dva dana. Imam informacije da smo u prethodnom periodu izgubili i psihologa.

Stoga, predlažem slijedeći Zaključak:

Zadužuje se općinski načelnik Općine Ilijaš i nadležna općinska služba, da u što kraćem vremenskom periodu organizuju sastanak sa generalnom direktoricom JU Domovi zdravlja Kantona Sarajevo, kako bi se u što skorije vrijeme unaprijedio rad specijalističko-konsultativne službe u Domu zdravlja Ilijaš.

ADNAN ABADŽIJA - vijećnik NIP-a

1. Da li je u potpunosti završen projekat kanalizacione mreže u naselju Gornja Karaula ako se jedna trećina objekata za stanovanje, naših građana, stanovništva tog naselja, nije spojila na istu?

2. Da li će se omogućiti spajanje svih objekata u naselju Gornja Karaula na kanalizacionu mrežu kako bi projekat bio u potpunosti isplativ i koristan za sve građane pomenutog naselja a ne samo za neke od njih?

3. Ko je odgovoran i nadležan za prokres lokalnih puteva koji prolaze kroz šume na području cijele općine Ilijaš i kada se može početi sa tim aktivnostima u ovoj i svakoj narednoj godini na svim lokalitetima naše općine.

Inicijativa:

1. Pokrećem inicijativu za uređenje i nasipanje lokalnog puta Brijest-Krtine, Gornja Karaula koji je u veoma lošem stanju za saobraćanje za lokalno stanovništvo.

Obrazloženje: Gore navedena, makadamska saobraćajnica je u veoma lošem stanju kako zbog oborinskih voda, tako i zbog lošeg materijala koji se ugradio na istu. Odvodni kanali su zapušteni i neupotrebljivi jer su zasuti materijalom sa puta i lošim održavanjem.

HALID DIZDAREVIĆ - vijećnik SDA

Pitanje ne prethodnoj sjednici OV-a je bilo:

Prema kojim kriterijima i zbog kojih razloga se nadležna općinska komisija odlučila za djelimičnu raspodjelu finansijskih sredstava iz fonda za mlade, gdje je od ukupno 10.000,00 KM, dodijeljeno 8.000,00 KM, a pri tom je Vijeću učenika SŠC "Nedžad Ibrišimović", za dva projekta umanjen budžet za 1023,00 KM?

Prije svega, u odgovoru je dostavljeno da sam ja vijećnik NIP-a i toliko o radu Komisije koja mi je dostavila odgovor. Drugo što je fascinantno je da su odgovorili na pitanja koja ja nisam postavljao.

Dakle, Halid Dizdarević je vijećnik SDA, Vijeće učenika SŠC "Nedžad Ibrišimović" je

aplikant na Javnom pozivu za aplikaciju projekata uz administrativnu podršku CARPE-DIEM-a To su dvije kontradiktore stvari o kojima se treba voditi računa i to su dvije materijalne greške iz kojih se jasno da zaključiti da Komisija uopće nije ni pročitala projekte. Ako se Komisija rukovala smjernicama o minimalnim standardima dodjele budžetskih sredstava putem transfera i subvencija, projekti su trebali biti odbačeni kao nezadovoljavajući ili u potpunosti finansirani, jer je u aplikacijama tačno naveden iznos traženih sredstava iz općinskog granta za projekte koji su aplicirani. Ne može Komisija kazati "evo daćemo ovoliko, dosta će biti, ili ne damo ovoliko". Zašto to govorim? Interesantno je da je Komisija u odgovoru navela da nije izvršila umanjenje finansijske vrijednosti projekata, već je ostavila dostatan nivo sredstava za realizaciju istih. Dakle, ne može Komisija smatrati je li dostatan ili nije određen dio sredstava i ne može znati da li će neko ko je aplicirao za projekat tražiti i naći još sredstava. Ono što je traženo iz Budžeta treba ili da se odbaci ili udovolji kao i za druge tj. sa drugim projektima koji su aplicirali. Ovo Vijeće je ove godine SŠC "Nedžad Ibrišimović" nagradilo za učešće u realizaciji značajnih projekata iz oblasti obrazovanja na području općine Ilijaš, a navedena Komisija je Vijeće učenika navedene škole proglasila neovlaštenim za ulaganje žalbe zbog uskraćivanja finansiranja projekata i to Odlukom bez pouke o pravnom lijeku.

KENAN HASIĆ - vijećnik SDA

Inicijativa/pitanje:

1. Pokrećem inicijativu o pokretanju I faze radova u MZ Ilijaš Grad kod zgrade A1.

Kada je planiran početak radova na uređenju date ulice u centru Ilijaša?

Obrazloženje: Planom rada za 2021. godinu planirani su radovi na uređenju ulice kod zgrade A1 u MZ Ilijaš Grad. Kada građani mogu očekivati početak radova?

2. Pokrećem inicijativu i pitanje vezano za prokres lokalnog puta na Karašnici. Ko je odgovoran za održavanje i prokres puta?

Obrazloženje: Lokalni put na Karašnici je u datom momentu zarastao i nije siguran za saobraćaj vozila i kretanje pješaka.

Dakle, da se prokres puta od pravoslavne crkve, pa sve do Šipadovih zgrada uradi u što kraćem roku.

3. Pokrećem inicijativu za popravku oštećenog saobraćajnog ogledala u Novom Naselju u MZ Ilijaš Grad.

Obrazloženje: Saobraćajno ogledalo je oštećeno, te je potrebna manja intervencija kako bi se ogledalo vratilo u prvobitno stanje.

4. Pokrećem inicijativu prema Službi Civilne zaštite u vezi najezde (pojave) zmija na užem području Ilijaša. Naime, u razgovoru sa građanima Ilijaša, došli smo do saznanja da su se zmije pojavile u užem jezgru grada na dijelovima koji su zarasli tj. zapušteni. Ovim putem vas molim da obiđete teren, te napravite plan i aktivnosti na polju čišćenja i uništavanja legla zmija i njihovih staništa.

5. Pokrećem inicijativu za sanaciju tj. popravku neon sijalica i to na lokacijama:

- prolaz kod dječijeg parka u centru Ilijaša (šetalište)
- podvožnjaci u Kadarićima (prolazi ispod autoputa).

HALID DIZDAREVIĆ - vijećnik SDA

Pročitao je prijedlog Zaključka, a zatim je OV-e jednoglasno donijelo slijedeći

ZAKLJUČAK

Zadužuje se općinski načelnik Općine Ilijaš i nadležna općinska služba, da u što kraćem vremenskom periodu organizuju sastanak sa generalnom direktoricom JU Domovi zdravlja Kantona Sarajevo, kako bi se u što skorije vrijeme unaprijedio rad specijalističko-konsultativne službe u Domu zdravlja Ilijaš.

SELMA BARIĆ - vijećnica SDP-a

Inicijativa:

1. Pokrećem inicijativu za postavljanje ogledala na sporednom putu u Podlugovima i to na dionici puta kod prodavnice građevinskog materijala Sadex, tj. na raskrsnici.

Obrazloženje: Građani mjesta Podlugovi, a i ostali koji prolaze tom dionicom smatraju kako bi im postavljanje ogledala na toj dionici olakšalo saobraćaj tim putem, te ne bi dovodilo do nekih neželjenih situacija. Na toj dionici nema nikakvih saobraćajnih znakova- sporedni je put pa je i razumljivo, međutim, vozači iz pravca Podlugova i Vratuše ne znaju ko ima prednost, a nit vide jedni druge (zbog velikog zida koji je između ta dva puta), pa bi im postavljanje ogledala itekako olakšalo saobraćaj na toj dionici. U prilogu Vam šaljem sliku, tj. satelitski pregled tog dijela Podlugova na kojem se vidi raskrsnica.



DINO ČUSTOVIĆ - vijećnik NIP-a
KENAN BUZA - vijećnik NIP-a

Inicijative:

1. Pokrećemo inicijativu za postavljanje mrežne pregrade na sredini terena dvorane.
2. Pokrećemo inicijativu da se zatvori prostor fitnes sale prema terenu dvorane radi lakšeg zagrijavanja prostora kao i sprječavanje i ispadanje predmeta u fitnes salu.
3. Pokrećemo inicijativu da se zatvori terasa, te iskoristi kao dodatni prostor za treniranje.
4. Pokrećemo inicijativu da se izmjesti šank kako bi se obezbjedio prostor za treniranje.
5. Pokrećemo inicijativu da se poprave česme na umivaonicima i tuš baterije.
6. Pokrećemo inicijativu da se obezbjede lopte i markeri za komercijalne termine rekreativnih sportova.
7. Pokrećemo inicijativu da se poprave semafori.
8. Pokrećemo inicijativu da se popravi ventilacioni otvor na krovu s ciljem prozračivanja sale u ljetnim i toplim danima.
9. Pokrećemo inicijativu da se uradi termo izolacija na objektu sportske dvorane.
10. Pokrećemo inicijativu da se obezbjedi potrebna oprema za snimanje i prenošenje sportskih i kulturnih dešavanja iz KSC-a, tipa turnira u sportovima, ligaških mečeva, predstava i promocija kulturnih dešavanja.
11. Pokrećemo inicijativu da se iskoristi postojanje LED ekrana za promociju sportskih i kulturnih udruženja istaknutih sportskih ličnosti i sportskih događaja.

SEID BEKTIĆ - vijećnik SDA

Inicijative:

1. Pokrećem inicijativu za hitnom sanacijom, odnosno asfaltiranjem puta u naselju Donja Karaula u dužini od 300 m. Naime, završenom kanalizacionom mrežom stekli su se uslovi za asfaltiranje navedene lokalne saobraćajnice, a radi se o dva puta dužine od po 150 m.

2. Pokrećem inicijativu prema nadležnoj službi Općine Ilijaš, te općinskom načelniku za čišćenje dvije deponije, čišćenje kanala, te raskresivanje šiblja i granja dionice puta Donja Karaula-Malešićki most.

Uzimajući u obzir da spomenuta donica puta ukupne dužine 2500 m prolazi kroz dvije općine i to Ilijaš i Vogošću, te imajući u vidu da je Općina Vogošća nedavno izvršila gore pomenute aktivnosti zajedno sa grupom građana naselja Donja Karaula, izvršio sam obilazak trase, te sam se uvjerio u katastrofalno stanje dionice puta koja pripada Općini Ilijaš. Napominjem da se radi o dužini puta od oko 1200 m, te da se isti često koristi kao alternativna saobraćajnica regionalnom putu R 445, dionica Malešićki most-Donja Vogošća. Isto tako smatram da bi se ovaj problem mogao riješiti uz minimalna sredstva i trud nadležnih službi.

3. Pokrećem inicijativu za asfaltiranje puta u dužini od 200 m u naselju Ribarići.

Dobio sam pritužbe građana pomenutog naselja da voda i kiše odnesu tampon koji se sa vremena na vrijeme nasipa i da je vrijeme da se pristupi trajnom rješenju tj. asfaltiranju. Ovaj put koristi preko 40 porodica tog naselja, a i u pomenutom naselju se nalaze i privredni subjekti kojima bi olakšali rad.

ALEN ARNAUTOVIĆ - vijećnik SDA

Inicijative:

1. Podnosim inicijativu za rekonstrukciju pješačke staze koja se nalazi između autobuske stanice "Centrotrans-Eurolines" i ulice Bosanski put, odnosno magistralnog puta R 445.

Obrazloženje: Navedena pješačka staza se nalazi neposredno pored magistralnog puta R445, oronulog je izgleda, koristi je veliki broj naših građana, te rekonstrukcija iste ne iziskuje značajna materijalna sredstva.

2. Podnosim inicijativu prema pravnom licu Turkish Ziraat Bank Sarajevo, sjedište ulica Zmaja od Bosne 47C Sarajevo, za stavljanje u funkciju ATM aparata u Ilijašu.

Obrazloženje: Veći broj građana se obratio sa zahtjevom za instalaciju gore navedenog uređaja, zbog toga što su korisnici ove banke, a najbliži ATM aparat se nalazi u Vogošći.

3. Podnosim inicijativu za rekonstrukciju pješačke staze koja se nalazi između ulice Kakanjska i ulice Hašima Spahića, u neposrednoj blizini dječijeg igrališta.

Obrazloženje: Pomenuta pješačka staza je neadekvatna, nefunkcionalna i nepromijenjenog izgleda proteklih 20 godina. Budući da se pomenuta pješačka staza nalazi u užem jezgru grada, te da je koristi veliki broj naših građana kojima je otežano kretanje istom.

ANEL BUMBULOVIĆ - vijećnik SDA

Inicijative:

1. Pokrećem inicijativu da se izvrši saniranje udarnih rupa na lokalnom putu u naselju Makljen koji prolazi kroz Pilanu XYLON.

Obrazloženje: Gore navedeni dio puta koji prelazi preko željezničkog kolosjeka koji vodi u INU-u postao je glavni pristupačni put za navedeno naselje. Pomenuta dionica puta je oštećena, sa većim brojem udarnih rupa i otežanom vidljivošću.

2. Pokrećem inicijativu prema nadležnim općinskim službama da se izvrši čišćenje i košenje trave na prostoru oko lokalnog puta u ul.Žrtava genocida u Srebrenici i dijelu zemljišta koje je u vlasništvu JP Željeznice FBiH.

Obrazloženje: Gore navedeno područje se nalazi u katastrofalnom stanju, sa dosta visokom travom i niskim rastinjem koje predstavlja potencijalnu opasnost za mještane te ulice i prolaznike. Ovih dana smo svjedoci pojave većeg broja zmija i drugih gmizavac koji potencijalno mogu predstavljati opasnost po građane.

KENAN BUZA - vijećnik NIP-a

Pitanja:

1. Zašto još uvijek nisu postavljene sve klupe na šetalištu u Ilijašu? Tačnije, postavljeno je 5 od 16 klupa koje su svi posjetioci šetališta rado koristili u prethodnim godinama. Molim da se klupe po hitnom postupku postave na pomenutu lokaciju da bi se građani mogli okoristiti od njih.

2. Da li postoji mogućnost i način da se na parkinzima u općini Ilijaš, prvenstveno u MZ Ilijaš Grad obezbjeđe određena parking mjesta za stanare stambenih jedinica ispred kojih se nalaze parkinzi. Po uzoru na druge općine koje su uradile sličnu stvar na način da stanari kupe - zakupe parking mjesto, cijenim da bi isti ili sličan model uveliko olakšao stanarima ovaj problem zbog kojeg se svakodnevno susreću sa kažnjavanjem od strane policijskih službenika, iako ni njima samim nije drago što svoj automobil moraju ostaviti na cesti ili trotoaru, a ne na obezbjeđenom parking mjestu.

Inicijativa:

1. Pokrećem inicijativu da se donese Odluka da danima u kojima se obilježavaju ratna stradanja na području općine Ilijaš ne smije ništa organizovati vezano za zabavne, kuturne i sportske manifestacije.

Ovi dani također treba da budu ispoštovani kao što je to urađeno i za 11.juli kada se obilježava genocid u Srebrenici.

AD-2

Izvještaj o realizaciji zaključaka sa 6. sjednice Općinskog vijeća Ilijaš

Diskutanata po ovoj tački dnevnog reda nije bilo, pa je OV-e većinom glasova usvojilo

Izvještaj o realizaciji zaključaka sa 6. sjednice Općinskog vijeća Ilijaš

AD-3

Prijedlog Odluke o usvajanju Izvještaja o radu i finansijskom poslovanju Javne ustanove
"Kulturno-sportski centar i Radio Ilijaš" za 2020. godinu

BENIS FAZLIĆ - direktor JU KSC i Radio Ilijaš

Dao je uvodne napomene, te kazao da je u godini pandemije kultura i sport, uz turističku djelatnost, doživjeli najveći udar, a u biblioteci je povećan broj čitalaca. Zaposlenih je 14, a 12 sati je dnevnog radijskog programa, rad dvorane 16 sati dnevno, biblioteka 10 sati dnevno. Što se tiče kulturnog segmenta, najmanje se radilo. Kino dvorana i sportska dvorana imaju izrazito visoke troškove grijanja u zimskom periodu i u narednom periodu ovo moramo rješavati zajedno. Izvještaj o radu i finansijskom poslovanju je urađen u skladu sa knjigovodstvenim standardima.

SELMA BARIĆ - vijećnica SDP-a

Zašto našim sportistima koji imaju izuzetne rezultate nije dozvoljeno da koriste sportsku dvoranu i to u periodu kada dvorana nije zakazana sportskim terminima?

ALMIR ŠPIODIĆ - vijećnik NIP-a

Kapitalni transfer iz Budžeta Općine Ilijaš uvećan je u odnosu na 2019. godinu sa 7.000,00 na 28.000,00 KM, te me interesuje u šta ste potrošili ovaj novac? Za iduću sjednicu da mi se dostave fakture i računi da vidimo šta ste to vi u KSC-u radili po pitanju ovog transfera.

VERNESA BEŠLIJA - vijećnica NIP-a

U Izvještaju o radu sportske dvorane naveli ste 162 termina rekreacije. Da li su to komercijalni termini, a građani se stalno žale da se ne izdaju računi za zakup termina u dvorani, a mislim na prostor sportske plohe i na spratu za stoni tenis?

Ako su ovo svi komercijalni termini, znači li to da svaki drugi dan imamo po jedan termin? Koliko to onda izađe? A znamo da ih ima više.

Šta sve ulazi u prihode od zakupnine, koji su to zakupi, a šta su prihodi od sportske dvorane?

Potraživanja od kupaca u 2020. godini iznose 83.410,00 KM. Možete li nam reći koliko je izašlo van valute, odnosno koliko je istekao rok za plaćanje i šta ste poduzeli po pitanju toga?

Od otvaranja dvorane znamo da je problem grijanje same dvorane. Na vanrednoj sjednici Upravnog odbora u februaru 2020. godine donesen je Zaključak da se izađe rješenje za alternativni način zagrijavanja. Šta je urađeno po tom pitanju, jer se u Izvještaju ne vidi ništa po tom pitanju i kakva ste rješenja iznašli?

Na prethodnim sjednicama OV-a Ilijaš postavljala sam pitanja za stubove u svrhu promocije političkih subjekata u predizbornoj kampanji 2020. godine gdje je nakon Javnog poziva kao najbolji ponuđač izabrana SDA. Na moja pitanja i zamjerke da ste nam poslali Ugovore koji nisu ovjereni, kazali ste da to nije korektno, da vam ne radi printer, da je nekorektno moje postupanje kao vijećnice, ali ne vidim u čemu. Mi imamo pravo da tražimo i ovdje smo da zastupamo građane, a pogotovo kada nam pošaljete materijal gdje nije jasno da li je taj Ugovor uopšte validan.

Da li je bila uplata i koliki su bili penali za kašnjenje i ako nije, šta ste poduzeli po pitanju toga?

ALEMA DŽAFO - vijećnica NIP-a

Kada je zadnji put održana filmska projekcija i da li je to bilo prethodne godine? Koliko često imamo filmske projekcije?

Kada je zadnji put održana pozorišna predstava, kako dječija, tako i za odrasle?

Da li imate neku saradnju sa nekim od pozorišta, kina i sl. ustanova? Ako da, sa kojim?

Da li je postojala mogućnost, iako je bila pandemija, da ostvarite neki kulturni događaj on-line i sl.?

Da li ste ikada pokušali kroz intervju, ankete i sl. utvrditi kakav bi to kulturno-sportski građani voljeli pratiti i šta je to što nedostaje građanima Ilijaša?

DINO ČUSTOVIĆ - vijećnik NIP-a

Da li je stručni saradnik za marketing uspio otplatiti svoju platu i doprinose svojim radom na marketingu i ovim prihodima koje vidimo ovdje?

KENAN BUZA - vijećnik NIP-a

Vidim da ste imali nastojanje da uspostavite saradnju sa ustanovama koje su na nivou Kantona Sarajevo, a bave se kulturom, te da isti nemaju očekivane rezultate, interesuje me, kojim institucijama, kada i za koje aktivnosti ste se obraćali vezano za saradnju sa ustanovama na nivou Kantona Sarajevo koje se bave kulturom?

BENIS FAZLIĆ - direktor JU KSC i Radio Ilijaš

Pitanje Selme Barić nisam dobro razumio.

SELMA BARIĆ - vijećnica NIP-A

Pitanje je bilo zašto našim sportistima koji imaju izuzetne rezultate nije dozvoljeno da koriste sportsku dvoranu i to u periodu kada dvorana nije zakazana sportskim terminima? Konkretno, košarkaš Sandro Antunović.

BENIS FAZLIĆ - direktor JU KSC i Radio Ilijaš

Nisam upoznat sa ovim slučajem, ali informisat ću se i odgovor dostaviti pismeno.

Pitanje vijećnika Almira Špiodića - pismeno ću dostaviti odgovor, kao i odgovor na pitanje vijećnice Vernese Bešlija. Odgovorno tvrdim da se za korištenje sportske dvorane izdaju fiskalni računi i ako ima takvih primjera da se računi ne izdaju, obratite nam se.

Kada je u pitanju grijanje pokušali smo naći alternativu - pelet, ali to je još uvijek u projektnoj izradi. Stubovi javne rasvjete na kojoj su postavljeni predizborni plakati - možda je odgovor bio nespretno. Imamo sve ovjereno, ali na fotokopiji se ne vidi pečat sa druge strane. Predmetna strana, u ovom slučaju OO SDA Ilijaš, nije izmirila dosadašnje obaveze i pokrenut je postupak naplate sudskim putem.

Pitanje vijećnice Aleme Džafo - pozorišne i filmske predstave, nije ih bilo. Pokušali smo ostvariti saradnju sa ustanovama kulture i sporta sa nivoa Kantona i tražimo da dođu da uspostavimo saradnju. U sklopu Manifestacije Ilijaški dani smo kontaktirali pozorište, Kamerni teatar za održavanje pozorišnih predstava, ali nismo ništa uspjeli. Preko Ministarstva kulture i sporta probamo da se dislocira dio sadržaja, jer se i za njih izdvajaju budžetska sredstva i ne mogu se pohvaliti nekom saradnjom. Kada je u pitanju anketa za

kulturne i ostale sadržaje - svake godine sa korisnicima ovih sadržaja koje imamo u KSC-u održimo sastanke i nastojimo se približiti željama i potrebama korisnika. Korisnici naših usluga i građani su najbolji sudija kada je u pitanju ovaj dio. Ali, evo inicijativa da provedemo anketu da vidimo koji je to sadržajni dio da obogatimo kulturni i zabavni život u našem gradu.

Pitanje vijećnika Dine Čustovića - da bi analizirali učinke stručnog saradnika, moramo sačekati određeni vremenski period i u ovom trenutku ima poboljšanja. U svakom slučaju, odgovor na ovo pitanje dobit ćete pismeno.

Pitanje vijećnika Kenana Buze - ustanove u Kantonu Sarajevo - mislim da sam već odgovorio na ovo pitanje. S aspekta sportskih aktivnosti, u proteklom godinama smo imali sesije sastanaka kako bi sportske sadržaje doveli ovdje u Ilijaš, ali nismo uspjeli. Nikada na ovom kulturnom planu nismo uspjeli se okupiti vezano za raspodjelu kulturnih dešavanja na ostale općine Kantona Sarajevo.

Na pitanja na koja nisam odgovorio, dobit ćete odgovore do iduće sjenice OV-a.

ALMIR ŠPIODIĆ - vijećnik NIP-a

Već dugo sam u Vijeću i ovi Izvještaji JU KSC i Radio Ilijaš dugi niz godina su poprilično uvijek isti, mala je razlika, pa gotov da je i broj stranica isti. Ono što primjećujem u ovom Izvještaju jeste da su pozitivno poslovali u odnosu na prethodne godine. Posmatrajući ovaj Izvještaj i kompletnu političku klimu, čini mi se da politika nije naklonjena prama ovoj Javnoj ustanovi koju je u proteklom periodu podržavala. U 2019. godini kada je nastupila pandemija, predložio sam, a i moje kolege su to podržale da se ne povećavaju plate u JU KSC i Radio Ilijaš. Međutim, kasnije je došlo do novih zapošljavanja i povećavanja plata i to se po ovom Izvještaju vidi. Tada sam predložio uštede na nekim stavkama, direktor je to prihvatio i načelnik općine je prihvatio da se smanji transfer od 340.000,00 KM. Međutim, vidim da smo prevareni, jer ništa od toga nije realizovano. Mnoga pitanja su ovdje postavljana i dostavljani su odgovori. Čitao sam odgovore kolegi Abadžiji i vidim da se odgovori kose i kada je u pitanju novo zapošljavanje. Meni ste rekli "zato što je pandemija, pa nam treba stručnjak da unaprijedi rad kako bi se finansijski vlastiti prihodi povećali ". Međutim, ovdje kažete "bila je pandemija, zaposlili smo ga, ali nije mogao doprinijeti toliko Javnoj ustanovi". Kada je u pitanju kultura i sport, besmisleno je bilo šta govoriti, vidimo šta se dešava, nešto je i bilo, ali kada je u pitanju sport nema niti jedne aktivnosti koju provodi direktno JU KSC. Istina, oni učestvuju u raznim sportskim aktivnostima, koristi se dvorana. U jednom periodu smo imali malonogometnu ligu mjesnih zajednica koju nije obustavio direktor Benis Fazlić, nego politika, ona politika koja danas najverovatnije neće usvojiti ovaj Izvještaj. Ovaj događaj je politika zaustavila iz razloga što ga nije kontrolisala.

U Izvještaju nije navedeno, ali u dvorani postoje besplatni termini i 2018. godine u tim besplatnim terminima je održan promotivni skup SDA.

Što se tiče finansijskog dijela Izvještaja, za nijansu su uvećani vlastiti prihodi, ali od 2016. godine se konstantno povećavaju prihodi iz Budžeta i dostigli su cifru od 340.000,00 KM, a sada je Planom planirano 360.000,00 KM. Očigledno je da je ova Javna ustanova postala poligon za političko rješavanje i zapošljavanje podobnih ljudi. To je dokaz da Javna ustanova koju finansiramo sa 340.000,00 KM platila kaznu zato što nije provela proceduru Javnog konkursa onako kako je trebalo i ovaj isti direktor je morao da zaposli osobu koja je bila politički podobna.

ALEMA DŽAFO - vijećnica NIP-a

Ovaj Izvještaj i Izvještaj JKP "Vodostan" d.o.o. Ilijaš koji smo imali, je neuporediv. Ovaj Izvještaj bih mogla nazvati "Zbog epidemiološke situacije nismo mogli ništa" i bukvalno, sav Izvještaj se sveo na to. Trebalo je vidjeti šta ostale općine Kantona Sarajevo nude. Postoje on-line predstave, baletne predstave, pozorišne predstave i uvijek se može pronaći način da se to omogući. Drugi mogu, ali mi u Ilijašu ne možemo. Najvažniji kulturni događaj koji se u Ilijašu dešava su "Ilijaški dani", a nakon toga "Čevljanska korida", a građani Ilijaša zaslužuju puno više i nadam se da ćemo ubuduće imati mnogo bolji Izvještaj, jer su kultura i sport ono što predstavlja jedan grad.

VERNESA BEŠLIJA - vijećnica NIP-a

Odgovori su jako šturi kao i Izvještaj i na većinu pitanja nismo dobili odgovore. Direktore, mislim da je jako neozbiljno da dođete tako nespremni na sjednicu OV-a. Molim vas da mi dostavite dokaz da ste pokrenuli sudski postupak naplate potraživanja vezano za stubove u izornoj kampanji. Nikakvih ideja u Izvještaju za 2020. godinu, kao ni u Planu za 2021. godinu za unapređenje, za povećanje prihoda. Da li ste ikada imali Javni poziv za izdavanje u zakup prostora na spratu za kafić, jer mislim da bi to donijelo dodatne prihode. Izvještaj izgleda kao da ga je pisalo dijete u osnovnoj školi i ne mogu da vjerujem, ako su i prethodnih godina bili ovakvi Izvještaji, da su usvajani.

Kada su u pitanju gramatičke greške, u Izvještaju je napisano Mješovita srednja škola Ilijaš "Nedžad Ibrišimović" i mislim da bi ste to trebali znati da možda već 15-ak godina ova Javna ustanova nosi naziv Srednjoškolski centar "Nedžad Ibrišimović" Ilijaš.

DINO ČUSTOVIĆ - vijećnik NIP-a

Pričat ću o saradnji sa višim nivoima vlasti (imamo Ministarstvo kulture i sporta na nivou Kantona Sarajevo i na nivou Federacije BiH) i JU KSC i Radio Ilijaš zbog nepotpune dokumentacije nije prošao na oba Javna poziva. Za mene su to kardinalne greške i ko god da to radi, a nije dostavio kompletnu dokumentaciju, nije numerisao stranice itd., on je nesposoban. Onda je normalno da nema nikakve saradnje kada obični Javni poziv ljudi nisu ispunili kako treba.

ADNAN ABADŽIJA - vijećnik NIP-a

U našoj općini imamo dvije Javne ustanove (JU "KSC i Radio Ilijaš i JKP "Vodostan"). I kada imate samo dvije ustanove onda možete biti ili prvi ili najgori.

Izvještaj možda nije radio direktor, ali on je u potpisu i možda su to ljudi svjesno uradili tako šturo i nekorektno. Jedna poslovice kaže "onako kako posijete, tako će i vas dočekati u budućnosti" i vi ili "oborili" ovaj Izvještaj direktora Benisa ili ga podržali, vi ćete učiniti nepravdu prema čovjeku koji je zaslužan za šta vi danas sjedite ovdje. Dok je politički odgovor bilo je uredu. Dobro razmislite.

AKIF BEŠLIJA - zamjenik predsjedavajuće

Sugerisao je vijećniku Adnanu Abadžiji da unaprijed ne govori šta će se desiti i da se vrati na tačku dnevnog reda.

ADNAN ABADŽIJA - vijećnik NIP-a

Što se tiče pandemije i svih dešavanja u ovoj godini, nisam vidio da je neko radio po pitanju kulture i u cijelom svijetu, znamo da su prekinuta i sva sportska takmičenja i za ovu godinu ne možemo konkretno ništa definisati i analizirati. Loše je bilo kompletno stanje, loše je bilo i u KSC-u, školama, ali nadam se da možete imati razumijevanja prema radnicima koji su tamo radili i u skraćnom vremenu, kao i svi mi.

MUHAMED HANDŽIĆ - vijećnik SBB-a (replika)

Sada, kao vladajuća struktura treba da "skine glavu nekome" i priča se o sažalijevanju direktora, a ne pričamo o Izvještaju. Sve kolegice i kolege Adnana Abadžije su negativno komentarisale ovaj Izvještaj, a po njegovom izlaganju mi ipak trebamo glasati za Izvještaj, ali Izvještaj ne valja. O čemu pričamo? Ako nešto nije dobro, treba reći da nije dobro i nemojmo to fakturirati nekome tamo "vladajuća struktura". Ja sam, kao vijećnik, uvijek bio protiv ovog Izvještaja. Ovaj Izvještaj nije dobar i neću uopšte da ga komentarišem. Na prošli Izvještaj sam dao svoj komentar i ovaj Izvještaj je samo "pođonjen". Činjenica je da Izvještaj nije sadržajan i nije urađen po elementima po kojim bi trebao da se uradi. Ja iz ovog Izvještaja ne vidim, pa skoro, ništa. Prema tome, o čemu pričamo? "Nije Izvještaj dobar, nema ono što smo tražili, nije nam odgovoreno na pitanja, ali ste vi krivi, jer ga nećete usvojiti".

ADNAN ABADŽIJA - vijećnik NIP-a (krivi navod)

Niti jednog momenta nisam iskazao sažalijevanje po pitanju bilo koga, ali mi je žao što nije bilo sportskih i kulturnih dešavanja.

DENIS DILBEROVIĆ - vijećnik SDA (replika)

Skrenuo bih pažnju kolegi Adnanu da razmisli prije nego što nešto kaže. Zašto? On govori da je Benis Fazlić zaslužan za to što mi sjedimo ovdje. On nema nikakve veze što ja i moje kolege sjedimo ovdje. Obzirom da je pandemija, s obzirom na situaciju u kantonu, državi, federaciji, bio sam razmišljanja da možda trebamo podržati ovaj Izvještaj. Međutim, kolega Almir Špiodić me ubjedio da promjenim mišljenje, pa mislim da ću biti suzdržan.

ADNAN ABADŽIJA - vijećnik NIP-a (krivi navod)

Obzirom da neki ne znaju čitati između redova, nisam rekao da je zaslužan direktno, možda indirektno, a između redova treba da pročitate da je čovjek bio pripadnik Armije BiH i to na komandujućim mjestima i zbog toga je to bila zasluga i jedan od nas je bio.

ALMIR ŠPIODIĆ - vijećnik NIP-a (replika)

Ja vas kolega Denise nisam ubjeđivao i drago mi je da shvatate da ovaj Izvještaj nije dobar i da ga nije trebalo usvajati prethodnih deset godina s obzirom da vi hoćete politički reći da sam ja kriv što nećete usvojiti ovaj Izvještaj. Ako govorimo o Javnoj ustanovi, direktor je prvi među jednakima i možda najodgovornija osoba. Ako vam je valjao deset godina i da sam na vašem mjestu ostavio bih ga do penzije, a ne da mu se pred penziju narušava dignitet itd. Nekorektno je da kažete da sam vas ubjedio da kao sada nećete glasati za Izvještaj. To je politika vas ubjedila kolega Dilberoviću da ne glasate za Izvještaj,

jer politika nema više interesa od ove Javne ustanove, ali ima interes da promjeni direktora.

DENIS DILBEROVIĆ - vijećnik SDA (replika)

Želim skrenuti pažnju da sam u ovom Vijeću tek nekih šest mjeseci i ne možete tako servirati to mišljenje meni. Vi ste rekli da ovo ništa ne valja i nije mi jasno zašto ste vi podržavali ovaj Izvještaj ranije, ako jeste, jer nisam prethodnih deset godina ja bio u Vijeću. Pričate da ovo ništa ne valja i kažete da bi mi iz SDA ovo trebali podržati. Nema logike.

ALMIR ŠPIODIĆ - vijećnik NIP-a (replika)

Kažete da ste u Vijeću šest mjeseci, ali ste u Stranci duži period i znate kako funkcionise JU KSC i Radio Ilijaš. Ja nikada nisam podržao Izvještaj i Plan rada JU KSC i Radio Ilijaš i uvijek sam kritički govorio. Međutim, ne mogu vam direktno reći kako to izgleda kada mi govorimo i ukazujemo na nepravilnosti, a vi postupate po naređenju politike. Znači, nisam nikada podržao Izvještaj, osim 2020. godine kada smo tražili da se ne povećavaju plate, da se ne vrše nova upošljavanja, da se smanje prihodi iz Budžeta Općine Ilijaš prema JU KSC i Radio Ilijaš, a ona su čak i povećana i kroz kapitalne transfere i kroz redovan transfer. Tada sam čestitao direktoru kako vrlo vješto svih ovih godina povećava prihode iz Budžeta, a vlastiti prihodi se smanjuju i mislim da ste to tako mogli i nastaviti.

MEHO HIDO - vijećnik NIP-a (replika)

Kolega Špiodić je spomenuo direktora Benisa da je jedan među jednakima. U materijalima smo dobili priopćenja predsjednika Upravnog i predsjednika Nadzornog odbora. Isto tako, po odgovornosti su i oni ti koji snose eventualne uspjehe i eventualne neuspjehe. Znači, cijelo vrijeme su ovi odbori pratili rad ove Javne ustanove i mogli su u međuvremenu i popravljati stanje ako je ono za popravku. Dakle, ne treba samo jednog čovjeka staviti na tapet, jer ovdje ima više odgovornih.

Diskutanata po ovoj tački dnevnog reda više nije bilo, pa je zamjenik predsjedavajućeg Akif Bešlija dao predmetnu tačku na glasanje.

ADNAN ABADŽIJA - vijećnik NIP-a

Izrazio je sumnju u glasanje i zatražio pojedinačno glasanje.

Alma omerović - izuzeće od glasanja

ZA je glasao vijećnik: Muhamed Handžić

PROTIV su glasali vijećnici: Vernesa Bešlija, Almir Špiodić, Amina Ramić, Alema Džafo, Anela Subašić i Selma Barić.

UZDRŽANI su bili vijećnici: Anel Bumbulović, Mehmed Sinanović, Elma Masnopita, Alen Hasković, Alen Arnautović, Adem Alić, Halid Dizdarević, Kenan Hasić, Denis Dilberović, Kenan Buza, Dino Čustović, Adnan Abadžija, Meho Hido i Akif Bešlija.

Odsutni vijećnici: Semir Dedić, Alan Šerak i Seid Bektić

SELMA BARIĆ - vijećnica SDP-a (poslovnička intervencija)

Prilikom glasanja kolega Handžić je prokomentarisao "ZA borca". Je li mi ovdje glasamo ko je s kim išao u školu, ko je u rodbinskoj vez s kim, ko je u Armiji BiH bio s kim ili glasamo ZA, PROTIV ili UZDRŽAN za finansijski Izvještaj JU KSC-a? Mi ne glasamo protiv direktora kako ste navodili, protiv njegove ličnosti i sl., nego PROTIV ili ZA Izvještaj koji je tako šturo dostavljen i kontradiktorne odgovore smo dobili.

AKIF BEŠLIJA - zamjenik predsjedavajuće

Sugerisao je vijećnici Selmi da je otišla ponovo u diskusiju.

SELMA BARIĆ - vijećnica SDP-a (poslovnička intervencija)

Ako može odgovor, da li glasamo po rodbinskim vezama, ko je s kim išao u školu, ko je bio u Armiji BiH s kim ili glasamo za finansijski Izvještaj?

AKIF BEŠLIJA - zamjenik predsjedavajuće

Rasprava po diskusijama je zaključena.

Konstatovano je da sa 1 glasom ZA, 6 PROTIV i 13 UZDRŽANIH

Prijedlog Odluke o usvajanju Izvještaja o radu i finansijskom poslovanju Javne ustanove
"Kulturno-sportski centar i Radio Ilijaš" za 2020. godinu

nije dobio potrebnu većinu

AD-4

Prijedlog Odluke o davanju saglasnosti na Plan rada Javne ustanove "Kulturno-sportski
centar i Radio Ilijaš" za 2021. godinu

BENIS FAZLIĆ - direktor JU KSC i Radio Ilijaš

Predložio je da se razmotri mogućnost da se ubuduće ovaj Plan razmatra u martu ili aprilu. Plan smo napravili kao da neće biti pandemije. Primjedbe koje ste imali na prethodnoj tački nastojat ćemo da uvrstimo u ovaj ostatak od pola godine Plana za 2021. godinu. U dostavljenom materijalu ste vidjeli kako bismo trebali poslovati u tekućoj godini.

KENAN BUZA - vijećnik NIP-a

Rekao je da se slaže sa prijedlogom po pitanju termina ove tačke dnevnog reda.

Pitanje: U kojoj fazi je moja inicijativa da Sportska dvorana Ilijaš promjeni naziv u Sportska dvorana "Rašid Buća" Ilijaš, obzirom da i nakon dva mjeseca nisam dobio odgovor?

ALEMA DŽAFO - vijećnica NIP-a

Pitanja:

1. Koliko je do sada navedenih Planova uspješno ili pak pokušano ostvariti i u ovoj polovini godine? Manifestacija "Ilijaški dani" su planirani, a da li je bilo još nekih programa?
2. Zašto su planirana povećanja sredstava za izdavanje i tekuće odražavanje zgrada i opreme i šta je konkretno uključeno u to?
3. Da li biblioteka planira ostvariti saradnju sa nekim od Udruženja u Ilijašu? Imamo udruženje CARPE-DIEM i mnoga druga i saradnjom bi bilo bolje stanje.

MUHAMED HANDŽIĆ - vijećnik SBB-a

Nadovezujem se na pitanje kolege Buze. Isto pitanje sam postavio prije tri godine i dobio sam odgovor koji je smiješan, "poltronski" da se mijenjaju spisi u registraciji firme ako damo naziv dvorani, kao što smo ja i Buza predložili, a to je Sportska dvorana "Rašid Buća". Dakle, ni u tom periodu nije bilo saglasnosti politike i mislim da je sve politika, ali ćemo naći modus da natjeramo tu politiku da ova dvorana ipak dobije naziv "Rašid Buća" što zaslužuje, a mi boljeg nismo imali i cijenim da nećemo ni imati.

BENIS FAZLIĆ - direktor JU KSC i Radio Ilijaš

Pitanje Kenana Buze i Muhameda Handžića - u toku su procedure koja treba da prođe ova inicijativa kada je u pitanju Upravni odbor. Ja lično podržavam inicijativu. Potrebna je promjena registracije na Sudu, a Vijeće će takođe donijeti Odluku vezano za izmjenu. Dakle, procedura je u toku i nadam se da će u što kraćem vremenskom periodu biti i na Vijeću podržana.

KENAN BUZA - vijećnik NIP-a

Znači, u protekla dva mjeseca nije održan sastanak Upravnog odbora da razmatra moju inicijativu.

BENIS FAZLIĆ - direktor JU KSC i Radio Ilijaš

Razmatrao je, ali treba da odradi određene pravne radnje koje bi uslijedile, ovo o čemu sam govorio.

KENAN BUZA - vijećnik NIP-a

Zanima me slijedeće. Koliko poznajem pravni okvir, neće se mijenjati naziv pravnog lica tj. ne mijenja se naziv KSC i Radio Ilijaš, nego se mijenja naziv jedog objekta unutar KSC-a i Radio Ilijaša. Jedan od primjera je pravno lice Skenderija gdje se glavna dvorana zove "Mirza Delibašić".

BENIS FAZLIĆ - direktor JU KSC i Radio Ilijaš

Pozivam vijećnika Kenana Buzu da dođe i da mu pokažem šta su meni napisali pravnici koje su radnje koje treba uraditi.

Pitanje vijećnice Aleme Džafo šta je urađeno u proteklih pola godine - jedan dio aktivnosti je održan, a kada je u pitanju tekuće održavanje zgrada, uradili smo projektnu dokumentaciju za utopljavanje Sportske dvorane, projektnu dokumentaciju za zamjenu stolarije na kino dvorani, aplicirali prema ministarstvima na kantonalnom i federalnom nivou. Ima prostora koje treba adaptirati i ovaj dio sredstava se odnosi na planirane, ali hoće li biti realizovana vidjet ćemo.

Saradnja sa udruženjima - imamo izuzetnu saradnju sa svim Udruženjima, srednjom školom, osnovnim školama na području Općine Ilijaš i Perzijsko-bosanskim koledžom, a i sa udruženjem CARPE-DIEM, a na ovu inicijativu pokušat ćemo saradnju poboljšati.

ADNAN ABADŽIJA - vijećnik NIP-a

Vezano za inicijativu promjene naziva sportske dvorane, problem je nastao od kada predsjedavajuća OV-a nije htjela da ovu inicijativu pretvorimo u Zaključak tj. da Vijeće izglasa ovaj Zaključak. Znači, tada je Vijeće trebalo da odradi svoj dio posla, a onda da pravnici idu u dalju proceduru. Mislim da je napravljena politička greška. Pozivam predsjedavajuću da Zaključak stavi na glasanje i da se Vijeće izjasni da li KSC Ilijaš može imati dvoranu po pomenutom nazivu.

ALMIR ŠPIODIĆ - vijećnik NIP-a

Ne znam koliko ima smisla uopšte da sada postavljamo pitanja, obzirom da nije usvojen Izvještaj o radu i finansijskom poslovanju Javne ustanove "Kulturno-sportski centar i Radio Ilijaš" za 2020. godinu.

Sviđa mi se konstatacija i kolegice vijećnice Aleme Džafo zašto Radio Ilijaš nikada nije napravio neki forum, da pita građane šta je to što nedostaje i šta je to što bi mi, kao Javna ustanova, mogli provesti da zadovoljimo potrebe građana. Ako bi se pravio novi Plan to bi trebalo uvrstiti na način da vidimo šta bi to građani željeli.

Plan za kulturu - identičan je kao i prethodnih godina "planirali smo, planiramo uraditi to i to, ukoliko bude sredstava iz Budžeta".

Jedan Zaključak iz 2018. godine je bio da se postavi ledena ploha u zimskom periodu u Ilijašu da se poboljšaju kulturno-sportska dešavanja, ali nikada nije realizovan, jer opet je problem bio novac, a mislim da se nisu dovoljno ni potrudili iz ove Javne ustanove. Sve ovo što govorim ne odnosi se lično ni na koga, jer postoji Upravni i Nadzorni odbor koji treba sve ovo da prate.

Napisali ste realizovat će se škola glume ukoliko bude sredstava i ako bude dozvoljavala situacija sa COVID-om. Može se odmah reći da se neće realizovati. Ovakve Planove rada ste godinama podržavali u ovoj sali, ali ja nisam. Tišina koja je bila na prethodnoj tački i tišina koja je sada na ovoj tački mi je dovoljan znak da ni ovaj Plan neće biti usvojen. Sa moje strane i neće, ali sa strane ljudi koji su godinama usvajali ovaj Plan rada nelogično je.

AKIF BEŠLIJA - zamjenik predsjedavajućeg

Ponovo je sugerisao da vijećnik ne prejudicira kako će ko glasati.

MEHMED SINANOVIĆ - vijećnik SDA (poslovnička intervencija)

Nismo na tački "predviđanja kako će ko glasati i kako je ko glasao". Tačka dnevnog reda je Prijedlog Odluke o davanju saglasnosti na Plan rada Javne ustanove "Kulturno-sportski centar i Radio Ilijaš" za 2021. godinu i molim da ostanemo na ovoj tački dnevnog reda.

ALMIR ŠPIODIĆ - vijećnik NIP-a

Imam pravo da pretpostavljam i unaprijed razmišljam.

AKIF BEŠLIJA - zamjenik predsjedavajućeg

Nemoj to samo javno iznositi i nastavite diskusiju po tački dnevnog reda.

ALMIR ŠPIODIĆ - vijećnik NIP-a

Kompletan Plan je sačinjen na predviđanjima. Ako ima novca, ostvarit će se neki kulturni i sportski događaj što je i logično. Planirana su sredstva od Antenskog stuba Karašnica i interesuje me na što JU KSC troši taj novac? To je jedan od primjera vlastitih prihoda i trebalo bi naznačiti da se ta sredstva utroše u kulturu i sport na području Općine Ilijaš. Maloprijašnja situacija je vrlo neukusna da se ne podrži Izvještaj bez i jedne izgovorene riječi, bez obrazloženja, kako su to uradile kolege iz SDA. Čestitam vam na "korektnosti".

DINO ČUSTOVIĆ - vijećnik NIP-a

Cilj i zadatak KSC-a je da informišu i podstaknu građane općine Ilijaš da se uključe u kulturne i sportske aktivnosti. Imamo mi događaje. Prije par sedmica je bilo juniorsko državno prvenstvo u stonom tenisu gdje su se neki naši takmičari izborili za reprezentaciju i nastupaju na balkanskim prvenstvima. Omladinu treba podstaknuti da što više upražnjava kulturu i sport. Na koji način? Na pomenutom događaju je bila vrlo mala posjećenost i to treba podići na jedan veći nivo. Ne može Radio Ilijaš objaviti samo jednom informaciju da se dešava državno prvenstvo. To treba konstantno objavljivati na portalima i Radio Ilijašu i ne samo za ovaj događaj, nego i za druge. Praviti intervjue sa igračima koji nastupaju i na taj način pravimo parametre u društvu, jer to su pravi parametri - djeca koja nas predstavljaju i u Evropi i u Svijetu. Postoji LED ekran koji treba koristiti. Ne govorim samo o KSC-u nego i o općini koja 95% finansira KSC i koja je isto tako odgovorna i zaslužna za sve što se dobro ili loše uradi. Nije problem da općina izdvaja i milion KM, da ima 100 zaposlenih, ali da je to funkcionalno. To je suština priče. Na tom LED ekranu, prije ovog takmičenja, zašto nije npr. bila Harisa Mešetović koja je reprezentativka BiH? To bi pozitivno uticalo na omladinu, jer ona je sa 16 godina reprezentativka, o njoj neko već priča. Ona je bitan faktor u našem gradu kao i ostali sportisti. Sve je to cilj KSC-a koji to mora da radi zajedno sa općinom i sa udruženjima koji su nosioci kulturnih i sportskih dešavanja. Obzirom da sam puno vremena proveo u toj sportskoj dvorani, pripremio sam set prijedloga, ko god bude slijedeći direktor, na koji način treba unaprijediti naročito sportski segment i kako treba u budućnosti planirati održavanje svih tih događaja. Znači, da to ne bude samo formalno ispraćeno, trebamo uključiti što više ljudi da prate te događaje.

ADNAN ABADŽIJA - vijećnik NIP-a

U ovom Planu ne vidim da je spomenut rad Sportske dvorane i sportskih dešavanja. Od uvoda imamo slijedeći Plan kulture, zatim Plan rada gradske biblioteke gdje su pretpostavke, prejudiciranja neka, i Plan rada Radio Ilijaša. Također, Radio Ilijaš na svim internet platformama i imamo marketing gdje je čovjek počeo da radi otprilike prije pola godine. Dakle, u ovom Planu ne postoji niti jedna aktivnost po pitanju sporta. U Planu da se navede jedan fudbalski turnir, košarkaški, odbojkaški, a naravno sa određenim Pravilnicima. Ne može naša općina preslikati detalj novogodišnjeg turnira u Visokom,

Vogošći itd. Ovo je veliki propust i nadam se da će se u narednim godinama ovo riješiti.

KENAN BUZA - vijećnik NIP-a

Dat ću osvrt na sadržaj ovog Plana, kao i prethodnog Izvještaja. KSC i Radio Ilijaš iz Budžeta Općine Ilijaš dobija cca 350.000,00 KM i otprilike taj iznos troše na plate uposlenih. Njihova jedina i glavna obaveza je da jednom dođu na sjednicu OV-a, podnesu izvještaj Općini Ilijaš i Općinskom vijeću, kao svom nadređenom. Znači, Izvještaj i Plan su dva najveća dokumenta prema poslodavcu. Upravo ta dva dokumenta koja su nama dostavljena, po mom mišljenju, su smiješna i žalosna iz dva razloga. Prvi razlog je taj da je veći dio sadržaja prepisan iz prošlogodišnjeg dokumenta, iz prethodnih godina, što ukazuje na to da se iz godine u godinu ponavljaju iste stvari iako sa svih strana pristižu nezadovoljstva radom KSC-a i Radio Ilijaša. To je rađeno iz razloga što je ovdje "prolazio Izvještaj i Plan" iako nije bilo osnova za to. Drugi razlog, po meni, je takav da omalovažavate mene, kao i sve ostale prisutne u sali OV-a, i sve građane općine Ilijaš. Sadržaj Izvještaja i Plana rada u pojedinim dijelovima je plagijat. Plagijat je nezakonito i neetično prisvajanje tuđeg djela koje se prikazuje kao vlastito. U materijalu koji ste nam dostavili korišteni su dijelovi iz: Plana rada Radija Gorski Kotor za 2021. godinu, sadržaj sa stranice OIV. HR, sadržaj sa stranice BIB.HR, velika većina iz doktorske disertacije iz Beograda od 2014. godine gospođe Mirjane Starčević. Ovim postupkom ismijavate ovu instituciju i vrijeđate inteligenciju mene, ostalih vijećnika, kao i građana općine Ilijaš. Onaj ko je pisao ovo, prezentovao i usvojio, te dao saglasnost, a to su upravljačke strukture Upravni i Nadzorni odbor koji su ovo odobrili, moraju da znaju da je ovaj čin ili postupak zakonski kažnjiv, te da mogu snositi ozbiljne posljedice. Predlažem da se ponovo urade Izvještaj i Plan autoriziran od strane uposlenika i upravljačkih struktura ove institucije, te da nam kao takav dođe na slijedeću sjednicu i to je jedan od razloga zašto nisam glasao za prethodnu tačku dnevnog reda. S obzirom na izneseno o Izvještaju i Planu, bio je saglasan Upravni i Nadzorni odbor i utvrdio da su navedeni Izvještaj i Plan dobri i da mogu ići na sjednicu OV-a. Upravni i Nadzorni odbor trebali bi biti korektivni faktor i kao takvi ove stvari bi trebali da provjere, koriguju i da nam takav Izvještaj dođe na sjednicu, te ih smatram da snose najveću odgovornost za ovo što su napravili.

VERNESA BEŠLIJA - vijećnica NIP-a

Samo u jednom bih se složila sa direktorom, a to je da se Plan rada treba usvajati ranije, a za sve vam je izgovor Korona. Kažete da će sadržaji iz kulture biti još oskudniji, manji, ali Korona nije samo u Ilijašu, pogledajte druge općine i kulturne ustanove kako pronalaze ideje, sadržaje i šta pružaju svojim građanima. Ukoliko nemate ideje, konsultujte se sa drugima, nije to sramota. Toliko godina je problem grijanja, ali opet u Planu rada ne vidimo ideju i adekvatan način kako to riješiti. Zašto ne biste na LED ekranu objavljivali termine koji su slobodni u dvorani da se koriste, pa bi možda i ja i ostali građani rado uzeli u zakup termin za neke svoje aktivnosti.

Diskutanata po ovoj tački dnevnog reda više nije bilo, pa je OV-e pristupilo glasanju.

ADNAN ABADŽIJA - vijećnik NIP-a

Izrazio je sumnju u glasanje i zatražio pojedinačno glasanje.

Alma Omerović - izuzeće od glasanja

PROTIV su glasali vijećnici: Vernesa Bešlija, Almir Špiodić, Adnan Abadžija, Amina Ramić, Alema Džafo, Anela Subašić, Selma Barić i Muhamed Handžić

UZDRŽANI su bili vijećnici: Anel Bumbulović, Mehmed Sinanović, Elma Masnopita, Alen Hasković, Alen Arnautović, Adem Alić, Halid Dizdarević, Denis Dilberović, Kenan Buza, Dino Čustović, Meho Hido i Akif Bešlija.

Odsutni vijećnici: Kenan Hasić, Semir Dedić, Alan Šerak i Seid Bektić

Konstatovano je da sa 8 glasova PROTIV i 12 UZDRŽANIH glasova

Prijedlog Odluke o davanju saglasnosti na Plan rada Javne ustanove "Kulturno-sportski centar i Radio Ilijaš" za 2021. godinu

nije dobio potrebnu većinu

Pauza od 12:00-12:20 h.

AD-5

Prijedlog Odluke o prestanku važenja Odluke o davanju saglasnosti za zaključivanje i potpisivanje Aneksa ugovora o prodaji broj:01/1-02-222-9/16 od 28.01.2016. godine

NIZAMA MALIŠEVIĆ - pomoćnica načelnika

Općinsko vijeće Ilijaš na sjednici održanoj 28.01.2016. godine je donijelo Odluku o davanju saglasnosti za zaključivanje i potpisivanje Aneksa ugovora o prodaji. Radi se o kupcu Hošić Rifija, a Odlukom koja je predmet stavljanja van snage taj Aneks ugovora bi se zaključio sa njenim sinom Hošić Sakibom. Predmetnom Odlukom, kupcu Hošić Rifiji, data je obaveza da prije nego se pristupi sklapanju Aneksa kupoprodajnog ugovora izvrši obaveza u vidu plaćanja poreza na promet predmetnih nekretnina što nije učinjeno. U međuvremenu, gospođa Hošić Rifija je umrla, a gospodin Hošić Sakib je po osnovu pravosnažnog rješenja o nasljeđivanju naslijedio prava i obaveze iz predmetnog Ugovora, platio porez i uknjižio se kao vlasnik predmetne nekretnine u Općinskom sudu u Sarajevu, kao i posjednik u katastarskom operatu Općine Ilijaš.

Diskutanata po ovoj tački dnevnog reda više nije bilo, pa je OV-e jednoglasno usvojilo

Odluku o prestanku važenja Odluke o davanju saglasnosti za zaključivanje i potpisivanje Aneksa ugovora o prodaji broj:01/1-02-222-9/16 od 28.01.2016. godine

AD-6

Prijedlog Odluke o neposrednoj pogodbi za prodaju neizgrađenog građevinskog zemljišta k.č.br.965/8 K.O. Ilijaš Grad

Diskutanata po ovoj tački dnevnog red nije bilo, pa je OV-e jednoglasno usvojilo

Odluku o neposrednoj pogodbi za prodaju neizgrađenog građevinskog zemljišta k.č.br.965/8 K.O. Ilijaš Grad

Prijedlog Odluke o raspisivanju općinskog referenduma

AKIF FAZLIĆ - općinski načelnik

Služba je pripremila Prijedlog Odluke o raspisivanju općinskog referenduma gdje je definisano referendumsko pitanje, dan održavanja referenduma, Komisija koja će provoditi referendum, sredstva za provođenje referenduma. Dakle, ključni član ove Odluke jeste referendumsko pitanje i ono je preuzeto od inicijatora za održavanje ovog referenduma tako da je ovo formalna Odluka koja je ispunila inicijativu vijećnika koji su zatražili da se održi referendum po ovom pitanju. Općina, sa aspekta obaveza u smislu provođenja ovoga, je kroz Odluku iskazala sve resurse da se referendum može provesti donošenjem ovakve Odluke.

MEHMED SINANOVIĆ - vijećnik SDA

Organizacijom referenduma ćemo imati organizaciju sprovođenja izbora, odnosno finansiranje istog što iziskuje novčana sredstva. Ako uzmemo uslove koji su nas zadesili ovu i prethodnu godinu tj. pandemijsku godinu u kojoj su Budžeti smanjeni i maksimalno opterećeni, mislim da nije poželjno da imamo ovu vrstu troškova bar ne u ovoj godini. Prvo moramo sprovesti referendum, pa onda od zavisnosti rezultata idu ponovni izbori. Dakle, to su dva izborna ciklusa.

ALMIR ŠPIODIĆ - vijećnik NIP-a (replika)

Obrazloženje inicijative za referendum:

U proteklom periodu mnogo vremena sam proveo u posjeti i druženju pa tako i razgovoru sa građanima iz svih dijelova naše prelijepe općine. Ne mogu, a da odmah ne naglasim da svi dijele jedno identično razmišljanje i to zaista alarmantno, da im je zakonski zagarantovano pravo da budu participant u odlučivanju na nivou MZ i Jedinice lokalne samouprave, oduzeto.

Prava građana da učestvuju u odlučivanju i raspravama narušeno je i najbogatije uskraćeno zbog političke klime koja je u najmanju ruku autokratska. Autokratska kažem, bez da želim ikoga vrijeđati, ali moram biti senzibilan i izraziti duboko žaljenje zbog situacije u koju smo dovedeni u 21. vijeku da ne težimo ka jačanju uloge mjesne zajednice u društvu, nego unazađujemo demokrtičnost društvenog poretka.

Usvajanje refernduma je direktno vezano baš za ovo obrazloženje, za građane i njihovu inkluziju. Inicijativa koju iznosim smatram inicijativom svih građana, a tiče se isključivo volje naroda za izmjenu Odluke kojom se proces izbora Savjeta mjesnih zajednica učinio nelegitimnim, neprincipijelnim, a povrh svega i nezakonitim.

ALMA OMEROVIĆ - predsjedavajuća

Sugerisala je vijećniku da je već diskutovao ranije i na fonu te diskusije pokrenuo inicijativu da dođe do ove Odluke o raspisivanju referenduma i da se drži tačke dnevnog reda tj. da priča o Prijedlogu ove Odluke.

ALMIR ŠPIODIĆ - vijećnik NIP-a

Pokušavam napraviti obrazloženje zašto je došlo do naše inicijative koju smo pokrenuli.

ALMA OMEROVIĆ - predsjedavajuća

Ranije ste dali obrazloženje i to smo uvažili tako da nema potrebe za dodatnim obrazloženjem.

ALMIR ŠPIODIĆ - vijećnik NIP-a

Zakonski okvir osnivanja mjesnih zajednica početno proističe iz Zakona o principima lokalne samouprave u FBiH član 26. i Zakona o lokalnoj samoupravi KS član 37. stav 1. i 2., a definisan je Zakonom o lokalnoj samoupravi KS član 36. stav 1., a onako kako je to definisano Odlukom o osnivanju Mjesnih zajednica Općine Ilijaš, načinu provođenja postupka izbora savjeta mjesnih zajednica sva pravna formulacija u praksi je obesmislena. Reforma mora zastupati i interese većine građana, a koji se ogledaju i u vraćanju statusa mjesnih zajednica onim mjesnim zajednicama koje su to imale, ali i uspostava statusa mjesne zajednice onim naseljenim područjima na kojima za to postoji objektivna opravdanost kao što su Kadarići, Salkanov Han-Popovići, Bioča i Nišići. Ukoliko OV-e ne podrži ovo referendumsko pitanje da građanima damo njihovo zakonsko pravo da kroz referendum mogu odlučivati vezano na nivou Jedinice lokalne samouprave i pojedinačnim dijelovima gdje građani mogu raspisati referendum samo za jednu mjesnu zajednicu, znači ukoliko im to ne dozvolimo, mislim da bi u narednom periodu trebali iznaći neko rješenje i uskladiti postojeće Odluke i akte koji tretiraju mjesne zajednice. U Statutu Općine Ilijaš se u trinaest članova spominje mjesna zajednica. I Statutom Općine Ilijaš prilično je definisana organizacija, izbori, način kandidovanja, imenovanje i razrješenje u mjesnim zajednicama.

ALMA OMEROVIĆ - predsjedavajuća

Pričate o nečemu što nije sastavni dio Prijedloga Odluke. Potpuno se slažem na fonu vaše diskusije i sve što ste kazali i ako treba donijet ćemo i određene Zaključke, ali da pričamo o ovoj tački dnevnog reda. To o čemu pričate će samo proisteći iz Odluke ako je usvojimo.

ALMIR ŠPIODIĆ - vijećnik NIP-a (replika)

Reducirat ću sve ono što sam htio reći da se vratim na tačku dnevnog reda. Kolega Sinanović je spominjao da organizovanje referenduma iziskuje određene finansijske troškove. Logično je da će organizovanje referenduma izazvati određene finansijske troškove, kao i ponovna reorganizacija mjesnih zajednica, ali troškovi ne trebaju da budu razlog da mi građanima nedamo mogućnost da se izjasne kroz referendumsko pitanje ili ako im mi, kao Vijeće, ne dozvolimo da se ovo referendumsko pitanje usvoji, onda moramo naći način, da li Zaključkom, da li nekom novom Odlukom, da vratimo demokratičnost u mjesne zajednice i vratimo mjesnu zajednicu građanima onako kako izvorno po Zakonu njima i pripada.

MUHAMED HANDŽIĆ - vijećnik SBB-a

Pomoći ću kolegi Špiodiću da ovo pitanje definišemo na način kako to većina nas želi ovdje. Kada se tiče Odluke o raspisivanju referenduma, mislim da je ona u ovo vrijeme zaista rizična, prije svega zbog mobilizacije građanstva. To je jedan od faktora koji je možda i odlučujući i koji ne smije niko prihvatiti na sebe u ovom momentu. Drugo,

referendum iziskuje velike finansijske troškove koji nisu Budžetom predviđeni. Ti troškovi, paušalno rečeno, prelaze iznos od 100.000,00 KM. Iz tog razloga, rukovodeći se sa svim ovim problemima i pitanjima koja bi bila postavljena kroz referendum, predložiti ću inicijativu koju možemo usvojiti u formi Zaključka, a to je da Kolegij OV-a, ako treba i prošireni Kolegij, izdefiniše sva ova pitanja vezano za promjene, a to je reorganizacija mjesnih zajednica, promjena Odluke o provođenju izbora i promjena Pravilnika. Dakle, da izdefinišu sva ta pitanja i promjene akata koje će približiti zakonskim okvirima i Zakonu o lokalnoj samopravi Federacije BiH i Nacrtu Zakona o lokalnoj samoupravi Kantona Sarajevo i sa tim prijedlogom dođu na OV-e kako bi mi mogli donijeti Odluku koja će vratiti demokratiju, kako Almir reče, građanima Ilijaša da oni biraju svoje predstavnike u najnižem nivou vlasti i koja će značiti budući sastav mjesnih zajednica na području Općine Ilijaš. Godine 2005. je bilo 18 MZ-a, pa je svedeno na 14, a migracijom stanovnika došlo je do povećanja broja stanovnika na svim našim područjima tako da postoji potreba za vraćanjem statusa mjesne zajednice onima koje je Almir naveo. Znači da Zaključak bude da to radi Kolegij OV-a na prijedloge svih nas ovdje.

MEHMED SINANOVIĆ - vijećnik SDA (replika)

Na fonu izlaganja vijećnika Almira i Muhameda, ispred KV SDA, podržavam ovaj Zaključak da pokrenemo analizu i rješavanje funkcionisanja i organizacije rada mjesnih zajednica na području Općine Ilijaš. Znači, da Kolegij počne sprovoditi ovaj Zaključak, jer u Kolegiju su sve političke partije koje participiraju u OV-u Ilijaš.

ALMIR ŠPIODIĆ - vijećnik NIP-a

Šef Kluba NIP-a će predložiti Zaključak, koji naravno možemo korigovati, a on se otprilike odnosi na ovo što su kolege govorili, s tim da smo mi mišljenja da Zaključak treba biti da se organizuje tematska sjednica kako bi se napravila analiza, a ako se ponište izbori, unaprijediti postojeću Odluku vezano za izbore i imenovanje i proširiti broj mjesnih zajednica.

ADNAN ABADŽIJA - vijećnik NIP-a

Pitanje za načelnika i nadležnu službu: Na koji način da pokrenemo proceduru da se izvrši reorganizacija mjesnih zajednica?

Ispred KV NIP-a predlažem, zbog manjkavosti i nedostatka u Odluci o načinu kandidovanja i izbora predsjednika i članova Savjeta mjesnih zajednica, da se ta Odluka poništi zato što npr. Mjesna zajednica Podlugovi ima 5-6 hiljada stanovnika i u Savjetu imamo 5 ljudi, a takođe i neke manje mjesne zajednice broje 5 članova Savjeta. U toj Odluci nije predviđeno kako će se popunjavati Savjeti, jer imamo primjer da su članovi Savjeta dobili mandat vijećnika i građani nisu birali nove članove u Savjet i mislim da je to bilo pogrešno. Prijedlog je da se poništi Odluka o načinu kandidovanja i izbora predsjednika i članova savjeta mjesnih zajednica. Druga stavka je da se u roku od mjesec dana organizuje tematska sjednica i definiše nova Odluka koja treba biti usklađena sa članom 86. Statuta Općine Ilijaš, Zakonom o sukobu interesa u organima vlasti poštujući Evropsku povelju o građanskom pravu svakog pojedinca. Mislim da je prethodnom Odlukom prekršen član 86. Statuta Općine Ilijaš. Dalje, da se Zaključkom razmotri formiranje novih mjesnih zajednica: Kadarići, Bioča, Salkanov Han i Popovići zajedno i Nišići.

Ovo je prijedlog Zaključka, a i kolege ako imaju prijedloga, da se izjasnimo.

MUHAMED HANDŽIĆ - vijećnik SBB-a

Diskusije su konstruktivne od svih vijećnika koje smo čuli. Predlažem pauzu od 10 minuta kako bi smo usaglasili prijedlog Zaključka.

AKIF FAZLIĆ - općinski načelnik

Ovo je jedno od najvažnijih političkih pitanja svake općine i mislim da postavljanje rokova od mjesec dana je neozbiljno. Ovo je pitanje kojim se, po mojoj procjeni, treba baviti pola godine. Kako ste diskutovali i kazali vezano za referendumsko pitanje, želimo da obuhvatimo sve što se tiče funkcionisanja i organizacije mjesnih zajednica. To je jedno, a drugo je da smo previše kritični prema trenutnom načinu funkcionisanja naših mjesnih zajednica i sigurno niste upravu ako to poredimo sa stanjem u 80 općina u Federaciji BiH. Više od pola općina u Federaciji BiH bira direktno, kroz Vijeće, Savjete mjesnih zajednica. Dakle, ovo što nešto govorimo da nije bilo demokratije, u našim mjesnim zajednicama je zaista bila demokracija po pravilima kakva smo mi uspostavili. Organizacija mjesnih zajednica je teška, nekada smo imali 9 MZ-a, pa 18, 14 i definisanje broja i granica MZ-a nije jednostavno i zbog toga nam treba vrijeme da to izdefinišemo, jer dobra organizacija je preduslov dobrog funkcionisanja mjesnih zajednica. Pitanje zakonodavnog regulisanja rada i generalno mjesne samouprave je potpuno nedorečeno (definisano u Federalnom Zakonu o principima lokalne samouprave vrlo uopšteno, Zakon o lokalnoj samopuravi u Kantonu Sarajevo je u nacrtu od prije deset godina) i trebamo znati da se taj Zakon neće donijeti za još nekoliko godina.

Podržavam ovu inicijativu da pokrenemo ovo sveobuhvatno pitanje bez političkih opterećenja, da tražimo najbolju organizaciju, najbolji način funkcionisanja i još da kažem da je u Nacrtu Izmjene i dopune Federalnog Zakona o principima lokalne samouprave. Izmjene jedino idu u ovoj oblasti i načelnici devet općina Kantona Sarajevo nisu dali saglasnost, a zastupa nas Savez općina i gradova, a dalje ćemo vidjeti šta će se dešavati, ali svakako želimo da se ta materija na najbolji način riješi i u tom kontekstu trebamo uskladiti i naše aktivnosti.

Ovo je moj poziv na objektivan pristup i da ne pravimo neke brze, ne pripremljene sjednice. Dobro je da Nišići vrate status mjesne zajednice, ali treba pripremiti argumentaciju i svaki prijedlog pojedinačni, a onda ćemo biti na dobrom putu da ovo postavimo i riješimo na najbolji način.

ALMIR ŠPIODIĆ - vijećnik NIP-a (krivi navod)

Kada je načelnik rekao da mi to planiramo raditi za mjesec dana - mi tematskom sjednicom za mjesec dana planiramo pokrenuti proces sa te sjednice, a ne za mjesec da donesemo konačnu Odluku.

Pauza od 12:55-13:10 h.

ALMA OMEROVIĆ - predsjedavajuća

Na pauzi su šefovi KV usaglasili prijedlog Zaključka koji je pročitala.

Zatim je dala na glasanje Prijedlog Odluke o raspisivanju općinskog referenduma, te konstatovala da predmetna Odluka nije dobila potrebnu većinu.

Prijedlog Zaključka je dat na glasanje:

ZA su glasali vijećnici: Alma Omerović, Mehmed Sinanović, Alen Hasković, Alen Arnautović, Alen Arnautović, Adem Alić, Seid Bektić, Vernesa Bešlija, Almir Špodić, Kenan Buza, Dino Čustović, Adnan Abadžija, Amina Ramić, Meho Hido, Anela Subašić, Selma Barić, Akif Bešlija i Muhamed Handžić.

UZDRŽANI su bili vijećnici: Elma Masnopita, Kenan Hasić i Denis Dilberović.

Odsutni vijećnici: Halid Dizdarević, Semir Dedići, Alan Šerak i Alema Džafo.

Konstatovano je da je Općinsko vijeće Ilijaš većinom glasova donijelo slijedeći

ZAKLJUČAK

Zadužuje se nadležna služba, odnosno Služba za društvene djelatnosti i poslove mjesnih zajednica Općine Ilijaš da u saradnji sa Kolegijem Općinskog vijeća Ilijaš, u roku od tri mjeseca, započne analizu, uspostavljanja funkcionisanja i organizacije mjesnih zajednica na području Općine Ilijaš.

AD-8

Prijedlog Rješenja iz imovinsko-pravne oblasti kojim se utvrđuje javni interes za izvođenje radova na proširenju sistema vodosnabdijevanja sa izvorišta "Jazići" na lokalitetu naselja Kamenica

Diskutanata po ovoj tački dnevnog reda nije bilo, pa je OV-e jednoglasno donijelo

Rješenje iz imovinsko-pravne oblasti kojim se utvrđuje javni interes za izvođenje radova na proširenju sistema vodosnabdijevanja sa izvorišta "Jazići" na lokalitetu naselja Kamenica

AD-9

Prijedlog Rješenja iz imovinsko-pravne oblasti kojim se utvrđuje javni interes za izvođenje radova na izgradnji filter postrojenja za prečišćavanje pitke vode sa izvorišta "Zajazine" na lokalitetu naselja Kamenica

Diskutanata po ovoj tački dnevnog reda nije bilo, pa je OV-e jednoglasno donijelo

Rješenje iz imovinsko-pravne oblasti kojim se utvrđuje javni interes za izvođenje radova na izgradnji filter postrojenja za prečišćavanje pitke vode sa izvorišta "Zajazine" na lokalitetu naselja Kamenica

AD-10

Prijedlog Rješenja iz imovinsko-pravne oblasti broj: 04-31-853/05

NIZAMA MALIŠEVIĆ - pomoćnica načelnika

Radi se o predmetu revizije Rješenja o dodjeli zemljišta izvršenog Odlukom Prelaznog Općinskog vijeća iz 1996. godine. Zahtjev za reviziju Rješenja podnijela je Močević Radmila, kao nasljednik oca Srete koji je po izjavama podnosioca zahtjeva stanovao u

objektu barake koji je bio izgrađen na parceli u Starom Ilijašu u blizini džamije. Odlukom Prelaznog OV-a ta parcela je dodijeljena Medžlisu Islamske zajednice u svrhu proširenja mezaristana. Izmjenama Zakona o građevinskom zemljištu 2005. godine čl. 87., 88. i 89. omogućeno je podnošenje zahtjeva za reviziju rješenja o dodjeli građevinskog zemljišta u propisanom zakonskom roku i gospođa Močević Radmila se obratila zahtjevom za reviziju rješenja u zakonskom roku. Služba je vodila postupak, utvrđivala činjenice, donosila dva puta prvostepena odbijajuća Rješenja, na koja je Močević Radmila ulagala žalbu, po pokretanju upravnog spora Kantonalni Sud u Sarajevu je donosio presude kojim je pobijao prvostepena Rješenja. Međutim, nije ulazio u rješavanje u meritumu, odnosno davao je samo uputu prvostepenom organu u smislu ocjene dokaza koji su dostavljeni u spis predmeta. Takvu Odluku ovog Suda smo imali i prošle godine, nakon toga smo ponovo vodili postupak, međutim, podnosilac zahtjeva ni u ovom postupku, kao i u ranijim nije dostavio pravno valjan dokaz na temelju kojeg bi zahtjev bio pozitivno riješen. Dakle, radi se o isključivo zemljištu koje je državno vlasništvo i na kojem nisu bila upisana nikakva prava niti ograničenja u korist trećeg lica. I u katastarskom operatu je bilo upisano državno vlasništvo, odnosno Općina Ilijaš. Nikada nisu bila upisana privatna lica. Podnosioci zahtjeva u više navrata su pozivani da dostave dokaze kojima dokazuju svoje pravo da li su imali ili stanarsko pravo ili pravo korištenja radi građenja. Međutim, nikada niti jedan jedini dokaz Službi nije dostavljen, a koji bi ukazivao da oni na Zakonu polažu svoje pravo. Smatramo da je pobijano rješenje doneseno na osnovu pravilno i potpuno utvrđenog činjeničnog stanja, uz poštivanje svih zakonskih akata, a što podnosiocu zahtjeva ne onemogućava put da preko nadležnog suda zatraži svoje pravo, pa ukoliko Sud riješi pozitivno, Općina Ilijaš će postupiti po pravosnažnom Rješenju.

Diskutanata po ovoj tački dnevnog reda više nije bilo, pa je OV-e jednoglasno donijelo

Rješenja iz imovinsko-pravne oblasti broj: 04-31-853/05

AD-11

Prijedlog Rješenja iz imovinsko-pravne oblasti broj: 06/1-27-991/21

Diskutanata po ovoj tački dnevnog reda nije bilo, pa je OV-e jednoglasno donijelo

Rješenja iz imovinsko-pravne oblasti broj: 06/1-27-991/21

AD-12

Prijedlog Rješenja o:

- a) razrješenju člana, a time i predsjednika Komisije za zaštitu ljudskih prava, ravnopravnost spolova, predstavke i prijedloge
- b) izboru člana, a time i predsjednika Komisije za zaštitu ljudskih prava, ravnopravnost spolova, predstavke i prijedloge

Diskutanata po ovoj tački dnevnog reda nije bilo, pa je OV-e većinom glasova donijelo

Rješenja o:

- a) razrješenju člana, a time i predsjednika Komisije za zaštitu ljudskih prava, ravnopravnost spolova, predstavke i prijedloge
- b) izboru člana, a time i predsjednika Komisije za zaštitu ljudskih prava, ravnopravnost spolova, predstavke i prijedloge

Informacija o stanju iz oblasti socijalne zaštite na području Općine Ilijaš za 2020. godinu

AMRA BUČAN - šef Službe za socijalni rad Općine Ilijaš

Obrazložila je Informaciju, te kazala da je u Službi socijalne zaštite Općine Ilijaš sistematizovano 16 radnih mjesta, a trenutno nedostaju dva socijalna radnika. Organizacija rada odvija se kroz stručne cjeline u kojima se svi poslovi obavljaju timski. U 2020. godini registrovano je 4237 lica koja su se obratila za neki vid pomoći i obavljeno je 236 terenskih posjeta. Navela je i statističke podatke koji su tabelarno prikazani u Informaciji. Pohvalila je sve ustanove sa kojima imaju saradnju, te sugerisala da se unaprijedi saradnja sa matičnim uredom, jer su im potrebni spiskovi umrlih lica za prethodni period-mjesec. Kada je u pitanju saradnja sa mjesnim zajednicama nema nikakvih kritika, ali je istakla da se korisnici Socijalne zaštite žale da kada im treba potvrda iz mjesne zajednice, vrlo često se dešava da predsjednici Savjeta su nedostupni i nema ih, te bi i to trebalo na neki način unaprijediti.

ADNAN ABADŽIJA - vijećnik NIP-a

Sugerisao je da bi uposlenici Socijalne službe trebali češće izlaziti na teren na gornji kraj općine, a naravno i ovdje, jer ima ljudi koji su u stanju socijalne potrebe, a sujetni su da se obrate možda.

Termini koje koristite u Informaciji, negdje je navedeno vaspitno zapuštena djeca, vaspitno zanemarena djeca, a na kraju imamo termine "poslati su u odgojni centar, odgojnu ustanovu" itd. Da li termine precizirati, da li koristite vaspitno ili odgojno?

Ispred KV NIP-a smo amandmanima tražili mnogo više sredstava da Služba socijalne zaštite koristi u ovom periodu nakon pandemije, u toku pandemije, ali neki ljudi nisu imali razumijevanja tako da je vaš Budžet uskraćen.

VERNESA BEŠLIJA - vijećnica NIP-a

Vezano za saradnju u pogledu transformacije Dječijeg doma Bjelave i otvaranja malog porodičnog Doma gdje djeca prelaze u ugodniji i topliji ambijent, da li ste pronašli prostor na području Općine Ilijaš za otvaranje malog porodičnog Doma gdje bi bila smještena djeca sa područja naše općine i da li ste razgovarali sa načelnikom ili nekim iz općine po pitanju toga? Takođe, na nekoj od prethodnih sjednica sam podnijela inicijativu da se djeci smještenoj u Dječiji dom Bjelave, kao i u ostale domove na području naše domovine, dodijeli stipendija od Općine, ali sam dobila odgovor da oni imaju svoja primanja-naknade preko Centra za socijalni rad, ali mislim da podršku, u vidu stipendije, Općina može izdvajati i mislim da ćemo to uspjeti da uradimo.

ALMIR ŠPIODIĆ - vijećnik NIP-a

Pohvalio je rad Centra za socijalni rad, kao i saradnju sa školama. Spomenuta je saradnja sa mjesnim zajednicama. Bio sam predsjednik Savjeta mjesne zajednice i imali smo odličnu saradnju sa Centrom za socijalni rad u jednom periodu. To je vrlo važno zbog građana, a i vas, da smo na usluzi građanima, jer vrlo često ljudi iz Centra npr. zbog numerizacije stambenih jedinica kada trebaju doći na adresu, su kontaktirali nas iz mjesne zajednice da im pokažemo adresu stanovanja. Inicirali smo od strane predsjednika

i savjeta mjesnih zajednica i održali sastanke u Centru za socijalni rad gdje smo predlagali i nastojali da uradimo socijalnu kartu za Općinu Ilijaš i možda negdje postoji taj projekat kod prethodnog šefa Centra ili da se pokuša raditi na izradi ove socijalne karte kako bi olakšali Centru, a isto tako i Savjetima mjesnih zajednica.

Kada je u pitanju statistika, prošle godine sam govorio da mi izgledamo kao socijalna općina i neki su mi zamjerali na tome. Neke stavke su zaista zabrinjavajuće, npr. 101 osoba nema porodično staranje i brine me činjenica gdje smo to mi kao ljudi, kao narod.

KENAN HASIĆ - vijećnik SDA

Obzirom da sam i ja bio predsjednik Savjeta mjesne zajednice, predlažem da pokušate organizovati jedan sastanak sa predsjednicima Savjeta mjesnih zajednica kako bi se uspostavila bolja komunikacija. Mislim da predsjednici Savjeta dobro odrađuju dio posla kada su u pitanju izdavanja potvrda i sl. Takođe, predlažem da prilikom volonterskog rada na terenu, predsjednici i Savjeti mjesnih zajednica u sklopu svoje mjesne zajednice imaju "odriješene ruke" za podjelu npr. humanitarnih paketa Obzirom da predsjednici dobro poznaju stanje u svojoj mjesnoj zajednici i ko je najugroženiji, ne bi bilo loše, a obzirom da ima slučajeva da se možda neko i zaboravi, da napravite jedinstveni registar socijalnih slučajeva po mjesnim zajednicama i da se ne dešava da neko dobije tri puta paket, a neko niti jednom.

AMRA BUČAN - šef Centra za socijalni rad Općine Ilijaš

Pitanje vijećnika Almira Špiodića - građani koji žive u ruralnim sredinama i koji su udaljeni od naše ustanove kažete da je problem u terenskim posjetama i da socijalni radnici ne izlaze na teren - mi ne izlazimo na teren gdje nemamo saznanja i zbog manjka uposlenika nismo ni u mogućnosti. Mi bi, kao ustanova, trebali preventivno da djelujemo, ali nažalost, to nam razne okolnosti ne dozvoljavaju. Međutim, gdje god imamo saznanja izlazimo na teren i pružamo svaki oblik pomoći u skladu sa zakonskom regulativom. Za sva lica koja su u stanju socijalne potrebe i imamo saznanja od bilo koga, u posljednju godinu od kada sam ovdje, a pretpostavljam i kolegica koja je bila prije mene, da se intervenisalo. Svi se mogu obratiti i sa anonimnom prijavom i mi ćemo uvijek izaći na adresu i djelovati u okviru zakonskih mogućnosti.

Kategorija vaspitno zanemarene djece i odgojni Centar - odgojni Centar je kantonalna javna ustanova definisana kao odgojni centar, a vaspitno zanemarena i zapuštena djeca zakonom prepoznata i terminologija koja se koristi u našem zakonodavstvu.

Pitanje Vernese Bešlija, saradnja sa dječijim domom i kada je u pitanju smještaj djece u male porodične domove vezano za planiranje na području općine Ilijaš - dva puta sam obavljala razgovor sa načelnikom na tu temu. Prostor nismo pronašli, ali i ranije je obećano od strane načelnika da bi se prostor mogao pronaći. Za vašu informaciju, na Bjelavama ima samo dvoje djece sa područja općine Ilijaš i to djeca sa poteškoćama u razvoju. Ostala djeca su izmještena u SOS dječije selo.

Zahvaljujem se vijećniku Kenanu Hasiću na prijedlogu za sastanak sa predsjednicima Savjeta mjesnih zajednica i taj sastanak ćemo organizovati.

ALMIR ŠPIODIĆ - vijećnik NIP-a (poslovnička intervencija)

Imamo li kvorum na sjednici?

ALMA OMEROVIĆ - predsjedavajuća

Kvorum imamo.

ADNAN ABADŽIJA - vijećnik NIP-a (poslovnička intervencija)

Kvorum imamo, ali krajnje je nekorektno da određeni broj vijećnika napusti sjednicu i ubuduće predsjedavajuća zamolio bih da se o tome vodi računa.

ALMA OMEROVIĆ - predsjedavajuća

Slažem se kolega, ali neke kolege su iz opravdanih razloga napustili sjednicu. Zahvaljujem se Amri Bučan na iscrpnoj Informaciji i OV-e je na raspolaganju za sve što može pomoći.

Nakon što je iscrpljen dnevni red, predsjedavajuća Alma Omerović zaključila je 7. sjednicu Općinskog vijeća Ilijaš u 14:00h.

Zapisničar:
Maida Habibović

PREDSJEDAVAJUĆA
OPĆINSKOG VIJEĆA ILIJAŠ
Alma Omerović, BA nov.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
certifikat:CRO20794Q

